



貢泰甫玩齋集序



余天性素迂常力矯治之然終不能入繩墨矯治或甚則遂病不能勝因思以為迂者必聖賢以為美德遂任之一切從其所樂常行四方必迂者然後心愛之而與之合凡捷機變者雖強與之然心終不樂也故暫合而輒去京師天下聲利之區也迂非所宜有嘗陰以求之士大夫之間得一人焉曰貢泰甫泰甫故學士仲章君之子能詩文少遊太學有時名曰自貴重不妄為進取有所不可交者不妄與交故吾二人者驩然相得若魚之泳於江獸之走於林也時泰甫為應奉翰林文字固多暇者即與聚榼有蔬一品魚一盤飲酒三行或五行即相與賦詩論文凡經史詞章古今上下治亂賢否書畫器無不言者意少適即照鑣過市據鞍談讕信其所如而止及暮無所止則與問曰將何之皆曰無所之也乃各策馬還自古暨今在公貴人



能求賢常少然自至元初姦回執政乃大惡儒者因說當國者
罷科舉擯儒士其後公卿相師皆以為常然而小夫賤隸亦皆
以儒為嗤詆當是時士大夫有欲進取立功名者皆強顏色昏
旦往候於門媚說以妾婢始得尺寸此正迂者之所不能為也
曰翱翔自放無所求於人已而皆無所遇予既歸淮南秦甫亦
以親嫌辭官歸除紹興推官不相見者為寃久去年太原賀君
為丞相蒐羅天下人才之有政譽者而秦甫之治為浙東西第
一乃得復召為應奉余適入朝為待制相見益歡計其別十年
矣吾年少于秦甫鬚髮皆白而秦甫銳然面紅白如 出其別
後所為詩文甚富且大進益知秦甫真豪士也夫以士之賢無
所遇而淹于下僚宜其悲憤無聊而不能盡也願乃自樹卓卓
以其餘力而致勤於文學且其貌克然非其中有所負蓋不能
爾然則吾秦甫之迂又過我遠矣夫古之賢士多不兼于文藝

文藝雖卑而世亦貴而傳之者愛其人故也不賢者之於文藝
雖極其精人猶將賤之亦何以為也秦甫忠孝人也其功名事
業當不待文與詩而傳而況於兼有之耶余昔与之別今見其
文如此今又當別去計相見時其文又必有過此矣於其行也
序而識之年月日青陽山人余闕序

玩齋詩集者中書戶部尚書宣城貢先生之所作而其門人謝
肅朱鑑所彙而萃之者也先生早侍先文靖公游京師入胄監
而聲華赫然為六館諸生之冠當是時文靖方在朝而諸先生
若卓序吳公松雪趙公四明袁公巴西鄧公清河元公雍虞公
石田馬公豫章揭公序陵歐陽公先後以道德文章鳴海內而
先生遨遊其間講明論議涵濡漸漬所得者深所蓄者大其學
該博而闕衍其識高明而超卓其才瑰奇而雄偉其氣剛大而
振發故其于詩也得乎性情之正止乎禮義之中博而不冗約

而不雷直而不倨切而不泥舒而不緩奇而不險深而不晦優
柔而不迫和乎而不躁雄放傑出而不蕩以肆如江湖盪滴而
莫測其涯也如風霆變化而莫見其迹也如雲霞卷舒出沒掩
靄千態萬狀而莫可名言也誠所謂一代文章之宗匠者矣用
壬曩歲辱在翰林先生時為兵部侍郎間出平生所為詩文以
慮千數百篇謹受而讀之欲為次其簡編以成一家之言而亦
得託名於不朽則先生以都庸使者持節南邁而不果矣其後
用壬以使事還江東遭時孔艱流離顛沛殺跡之邈不相聞者
且數年今年春先生將漕閩廣粟道出海昌值海上有警而遂
留居焉用壬日陪杖屨散步林皋溢容進曰先生昔所示文若
詩敢請以畢前志先生喟然嘆曰自喪亂以來圖書散失吾文
藁之所存者十之二今吾老矣追思盛年之所作殆不可復
矣然吾胸中之耿耿者猶在雖孤客遠寓而感時撫事未嘗不

形之咏歌也因發篋中所藏前後得四百餘篇披閱數四于是
知先生之學益至而識益遠才益廣而氣益充非仁義道德之
素積于中歷困窮患難而不動其心者安能若是也哉亟欲類
之成帙適有校藝江浙之行又不果既歸則其門人謝肅已序
次之矣惜乎用壬不能輯錄於未散失之前而肅也乃能掇拾
於已遺落之後非惟有愧于先生而亦有媿于肅矣然而肅是
編之成獨非用壬之志之所存乎用敢序于篇端至正十九年
秋八月望日諸生桐川錢用壬謹書

國朝統一海宇氣運混合鴻生碩儒先後輩出文章之作寔有
以昭一代之治化蓋自兩漢以下莫於斯為盛矣當至元大德
間有若陵川郝文忠公柳城姚文公東平閻文康公豫章程文
憲公吳興趙文敏公皆以前代遺老值國家之興運其文麗蔚
質奧竄為近古延祐以後則有臨川吳文正公巴西鄧文肅公

清河元文敏公四明袁文清公浚儀馬文貞公侍講蜀郡虞公尚書襄陰王公其文典雅富潤益肆以宏而其時則承平寢久豐亨豫大極盛之際也今天子元統以來致治為尤盛而文學之士至于今則遂以日經淪謝而幾于寥々矣如廣陽宋正獻公豫章揭文安公待制東陽柳公承旨濟南張公參政趙郡蘓公皆不可復作而承旨庐陵歐陽公論德東明李公侍講金華黃公雖巋然猶存而亦既老矣其方嚮任用而擅文章之名者惟吾宣城貢公乎公之先君文靖公在延祐中与諸公齊名公克承家學又早游上庠受業諸公間故其間學培植深厚見于文章者氣充而能暢辭嚴而有體講道學則精而不鑿陳政理則辨而不夸誠足以成一家言之而繼前人之緒矣後之欲知一代治亂之盛者此其有不足徵者乎雖然公之所表見不特文章而已其于政事尤長也其為理官治行竄列郡其為御史

所論列皆天下之大務居夏官則奉詔覈驛戶于北境司水衡則朝廷復以中原餽饌之事倚之凡其所至輒有偉績不可悉數也大抵政事文章本一揆也達事情而號令明執法度而賞罰允此政事也而文章豈外是乎嗚呼西漢遠矣考之唐宋論文章則韓文公歐陽文忠公論政事則陸宣公范文正公而已公之文章寔追韓歐之法其于政事不猶陸范之志哉抑非韓歐不施于政事而陸范不著于文章也就其所長合而求之斯為善論公者矣夫讀其文必也論其人求其人心也論其世故禱序公之集因得以具述焉公名師泰字泰甫起家國子學生累遷官而入翰林為應奉選宣文閣授經郎陞翰林待制除國子司業遂為吏部郎中拜監察御史尋陞侍郎復入吏部俄遷兵部侍郎出為都水庸田使今遷福建閩海道肅政廉訪使云年月日金華王禕序

宣城貢泰甫先生玩齋集十有二卷為詩賦序記傳說箴銘贊頌問辨題跋碑碣誌表禱者共六百五十三首又有序文年譜別自為一卷編輯既成為之序曰先生名師泰字泰甫玩齋其別號也仕元為禮部尚書尋改戶部先生之父文靖侯在皇慶延祐間以文學遭際與虞揭袁馬諸公頡頏上下先生夙承家學而又嘗親炙諸公且及游卓序先生之門故其學淵源深而培植厚塗轍正而條理明其見之著述氣味肖諸賢言語妙天下黜之于其幽悠、乎其長煜、乎其光有虞之宏而雄健不減于馬有揭之瑩而清俊則類于袁其于理趣尤儼然吳氏之尸祝也故當時評先生之文者列之于六大家之次序其詩者亦謂可與道園學古錄並觀皆非虛語矣惜乎遭值於世雖仕至前官特出於行省之所版授且徘徊吳越甌閩之區而未嘗大顯于朝故其文章之行世弗克如虞揭袁馬諸公之盛又其

後也流寓海寧以歿未幾而元運亦改所在兵燹遺稿所存亦無幾矣念予幼時仰承庭訓家君裕菴嘗手抄先生友迂集一編教之曰此人文之精者也小子熟之其有得乎比壯出從豫章羅孟維先生游又得所謂東軒集者每展誦而紬繹之則心暢神怡快然如有所得而犹以不獲觀其大全為恨也天順初元蒙恩假守寧國而屬邑宣城寔先生桑梓之邦到官之初首訪文獻先生之諸孫武欽以其所藏玩齋稿并年譜來上首尾脫落僅得詩文若干首餘無存者于是博求之大家世族卷軸之所題識名山勝地碑版之所傳刻又得詩文若干首合前二集彙而萃之各以類從列為十有二卷總題之曰貢禮部玩齋集序而刻之學官嗟夫先生之文美矣至矣是雖昆明劫火之後仙官六丁下取之餘殘編遺墨尚幸歸然如魯靈光犹有存者其傳世行後無疑也一時門人高第謝肅塗穎劉中華莫莫

玩齋先生紀年錄
五

閩南等集編次之舊既已不可復見而武威余公山東李公金華黃公吾郡楊公諸名賢所為序文則犹具在走也何人敢贅一語于其間哉第以斯文得失之由區區蒐輯之意与夫刊刻之歲月皆不可以無述故不揆無陋而竊書之觀是集者尚矜其用心而畧其僭踰之罪則又幸矣天順癸未夏五月端陽日會稽沈性謹序

玩齋先生紀年錄

大德二年戊戌昔成宗在位公以是年五月二十一日生于宣城之南湖

大德三年己亥

大德四年庚子

大德五年辛丑

大德六年壬寅

大德七年癸卯

大德八年甲辰

大德九年乙巳

大德十年丙午

大德十一年丁未公十歲

至大元年戊申

至大二年巳酉

至大三年庚戌

至大四年辛亥

皇慶元年壬子武宗即位

皇慶二年癸丑侍父提學江西會草廬吳先生堂試中第一

延祐元年甲寅仁宗即位

延祐二年乙卯

延祐三年丙辰娶寧國路總管之女張氏

延祐四年丁巳公二十歲

延祐五年戊午入太學 自宣入京

延祐六年巳未

延祐七年庚申

至治元年辛酉英宗即位

至治二年壬戌

至治三年癸亥

泰定元年甲子晉郎中江浙鄉試

泰定二年乙丑

泰定三年丙寅

泰定四年丁卯公三十歲

天曆元年戊辰明宗即位公改治詩經中國子選授太和州判

官未赴 自京歸宣

天曆二年巳巳丁外艱

至順元年庚午寧宗即位

至順二年辛未除歙縣丞未赴

至順三年壬申辟江浙省掾

元統元年癸酉脫懽皇帝即位

元統二年甲戌棄官以中書檄行省不得用部下士為掾以江南三省對調公不從上書丞相辭去不仕

至元元年乙亥

至元二年丙子
至元三年丁丑除翰林應奉文字同知制誥兼國史院編修官以兄來官翰林辭避南還養母公年四十歲

至元四年戊寅葺慶日亭

至元五年己卯丁內艱

至元六年庚辰

至正元年辛巳為蚓竅鷓鴣適粟中春等詩以圖宴息

至正二年壬午

至正三年癸未

至正四年甲申除紹興推官既任考文江浙

至正五年乙酉

至正六年丙戌

至正七年丁亥召為翰林應奉奉旨編纂遼金宋史公年五十

至正八年戊子遷授經郎兼經筵譯文官

至正九年己丑遷翰林待制奉旨兼參贊經筵官進講經筵明

君子小人之辨上喜錫賚甚厚

至正十年庚寅改國子司業割司業俸并節行供浮費積貲廣

學舍六十間以及諸生宿處

至正十一年辛卯四月奉制不拘南士擢吏部郎中三日後拜

監察御史分巡東道

至正十二年壬辰奉制再除吏部侍郎

至正十三年癸巳冬調兵部侍郎以兵部侍郎差次口北十三

站豪貴懾服貧民甦息擁拜遮道作榆林有感詩

至正十四年甲午八月除庸田使和糴二百万以供軍

至正十五年乙未正月除江西廉副未任陞福建廉使六月任

十月除禮部尚書道出建寧十一月除平江路總管十二月二

十八日任

至正十六年丙申正月三十日城陷于張氏公抱印求死不獲

作幽懷賦以自見隱居吳淞江上主釣臺山長吳景文易姓名

為端木氏號庚契子淵之翁

至正十七年丁酉八月扈印納于浙省十月丞相達公九成以

便宜除兩浙轉運使隱居杭之西山公年六十歲

至正十八年戊戌八月陞江浙叅政居杭州作備萬齋

至正十九年己亥正月除戶部尚書奉詔漕閩粟皇太子書務

本二字賜之赴閩道梗二月遷居海寧之北郭時鏞得列弟子

負後八月自海寧航海達閩而眷序僑寓如故冬值兵入境鏞

具舟迎夫人眷序過家留居東野草堂

至正二十年庚子九月除秘書監卿還京師公寓閩中香嚴寺

作高風臺

至正二十一年辛丑公寓閩中

至正二十二年壬寅公年六十五七月七日自閩中歸眷寓命

其地曰小菴源冬十月十日歿于寓所

至正二十三年癸卯是年春鏞割地以葬寔閩三月三日也閩

士曰廣高風臺改先生祠以綿祭祀

玩齋紀年錄終



卷之二

貢禮部玩齋集卷之一

元宣城貢師泰泰甫著

賦

小篔簹賦

謂木非喬謂草非繇不蔓而天不葩而條閒庭翳_レ密室脩_レ
 名小篔簹有扁之昭或曰子真以篔簹為小耶則仙標出塵直
 幹凌翬轂諧鳴鳳影扶翔蛟洒清風之葉_レ弄明月之梢_レ雖
 並戶而當軒實拂雲而騰霄子以植數少為小耶則西窓三四
 一徑五六緗實漂黃錦苞凝綠或開樽而射金或援琴而擊玉
 雖無千頃之多聊可數竿而足然則小篔簹果何在乎主人曰
 肩高於墻斗大於室門可旋禮居僅容膝脩及尋丈廣貿咫尺
 以溉以種充我餘隙匪谷斯盈匪川斯溢咸晉林之_レ賢少唐
 溪之六逸異蔣詡之三徑慕子猷之一日况城西幽迥堂北愉



皖平安之報維斯與晚遺形尚存先德不遠則又此心之所以
思慕而憂備也貧簞雖小其義實大謹葺謹培式萌孝愛或曰
唯唯子誠是在虛心有容直節無懈庶其茂之勿翦勿敗

五言古詩

古意二首

功名果何為輕重天下士得之入雲霄不得墮泥滓朝列三公
行莫與匹夫比榮辱既由人富貴非在己胡為竟迷途白首憂
不止縱有蓋世勲僅遺一紙史往者尚如斯後來亦徒爾乃知
巢許流高蹈良有以

又

黃金本何物舉世相紛爭賤者可以貴死者可以生既解平城
圍亦散六國衡神用信莫測萬寶孰敢嬰亦有高世士唾視瓦
礫輕寧為凍餓殍不受污辱名斯人儻可見吾將與同盟嗟哉

首陽薇千載有餘清

擬古三首

東南有佳人遠在水一方綺疏粲飛樓曲闌圍洞房意態閒且
靚氣若蘭蕙芳纖阿褻妓服雜佩懸明璫流風迴皓雪明月舒
其光白面誰家子錦鞍青絲韉翩然一見之下馬立中堂可望
不可即五采盛文章

又

嶰溪有美竹挺挺霜雪中何人斲而節製為十二筩宮商自相
應鳳鳥鳴雌雄一鳴垂衣裳再鳴致時雍從此去不反治道竟
少隆鄙哉叔孫氏綿蕤變王風寥寥數千載伊誰啓冥濛后皇
如有作聲教垂無窮

又

採藥鍊神丹鍊久丹自成丹成出寶鼎旭日紅霞明服之不終

朝身若一羽輕騎龍跨八極翩然凌太清太清邈金闕玉女羅
雲鞞飄蕭白霓裳參差紫鸞笙元氣在呼吸因之薄蓬瀛下視
寰宇內人事徒蠅營

道懷二首

日入柳風息月上花露多東軒頗幽敞夜靜時一過鳥散庭中
樹虫鳴階下莎北斗何低昂踈星沒橫河獨賞誰晤語感慨成
悲歌懷哉岩桂臺邈在姑山阿

又

城東數椽屋墻壁半摧傾驅童旋泥補聊以潛吾生門前一隙
地短畦亦縱橫布種才幾日雜蔬盡勾萌夜來涼雨後青々盛
滋榮採掇且勿過吾將俟其成

感興五首

玄陰結層空白晝慘不開鴻雁失其群鳴殺亦何哀嗷々在江

渚欲下復徘徊游子獨何之感慨激中懷緘書將寄遠霜露白
皚皚

又

芙蓉生綠水々綠花更好採花當及時莫待顏色老美人久不
見華髮忽已皓因之遺芳馨聊以慰懷抱失意且勿嗟令名當
共保

又

悲風從西來海樹何蕭瑟薄寒中人肌毛髮為慘慄疎林動鴉
鵲壞壁鳴蟋蟀出門忽四顧愴恍若有失仰面對青天青天行
白日

又

客有凌寶劍紫氣射牛斗年少乍得之日夜不去手豈知靈異
物佩服終難久一朝騰波去化作蒼龍吼何時復歸來為國殄

群醜

又

道旁有枯桑中空上無枝豈惟八蚕厄亦受群蟻萎雨露忽以
濡依然發華滋雖非梁棟材猶堪琴瑟絲子能慎封殖成當當
有時

赴京別親友

崇堤衛芳塘，上種楊柳楊柳年，青慈親未白首送我不忍
別出門漫携手親友陟高岡立馬望良久離懷急欲醉盡此樽
中酒

姑孰道中

朝發慈姥山暮宿吳公橋日入氣猶溽清懷厭煩囂隔江風雨
至綠樹涼蕭，隣舟頗相好有酒忽見招明發波浪濶相望一
何遙

和吳子彥高齋雨坐韻

高城暮色重空齋秋思多蕭條響林籜集池荷開門望青
山但見白鳥過獨坐領幽趣悠然發浩歎此意誰與共餘暉在
岩阿

雨坐有感簡胡仲明劉太初并寄鄱隱梅鍊師

茂林延鮮颯空庭灑飛雨衆物欣以榮綠苔自清暑蜻蜒飛水
上蜉蝣亦生羽感茲晤玄况脩然契真毋紛紛泥滓間變化無
恒處

又

晨氣含餘清夏雨欣衆綠閉門鬱佳興開軒縱遐矚稚菊齊庭
葵新篁出林木徘徊感物化生意一何速念此涵毓功終焉愧
寒曝

湖上納涼有懷吳子彥

天風吹海樹瑟瑟秋氣涼河漢西北流衆星耿微光昔我同袍
友遠在水一方相思不得見展轉清夜長遙聞鳴笳發攬衣月
蒼蒼

題何氏永思亭

上山山有顛涉水水有涯父母恩罔極孝心無盡時風吹庭前
樹鳴聲一何悲白日墮青天零露委華滋死者不可作遠者亦
可追哀哀蓼莪詩以永千載思

送潘仲金赴德興教諭

山中思偃息盡日掩重扉方慙素交寡况與知己違春江雨新
漲楊柳綠依依攀條未忍別孤帆已如飛芹宮盛衿佩日夕候
光輝尊壘雜邊豆笙鏞間絃徽教成毋久淹倚門望東歸

歲莫別陳華仲

翩翩五色翰結巢在丹山朝飛白玉池莫宿青雲閣偶然落漪

上文采何爛熳歲晚天苦寒况此風雪孱高梧不結實啄食良
獨難瑤臺十二層群僊列佩環奮身一飛去邈矣難追攀

次陶公美韻并簡劉景初

我行自天北君居在江南南北各相望有如商與參歲月亦已
遠寤寐懷好音默默無所寄時復理橫琴昨日得緘書甚慰契
關心書云各努力隙駒易駸駸履道貴平易為文去艱深感子
意良厚所愧力不任姑山竹可支姑溪梅可尋梅竹耐歲寒相
期更自今

贈蒼梧縣尹

朝觀扶桑日暮望蒼梧雲重華去已遠神氣猶綢繆遺黎在山
下飲食而耕耘懷哉賢大夫彈琴咏南薰胡為不我即使我心
殷々秋風洞庭波綠竹愁湘君

春日同達兼善祕卿熨蘭亭分韻得工字

青山在城西白日在城東車馬出門去光彩何曛々密樹被暘
谷踈華表陰峰傑備諧雅會委蛇盛儀容席蔭空靄綠盃流渚
霞紅秉簡滌煩想舞雩繼遺風俯仰宇宙間修短均化工誰是
廣成子長年住崆峒

題王維輞川圖

開圖縱竒觀江山鬱相繆兩垞轟岩々重湖水滌々還宇抗疏
嶺危亭俯員流春鳩辛夸發百陌高槐稠竹館翠陰晚芟泚紅
實秋遠墅漆未割近園枿欲收驚鳥避溪泉野鹿逐岩幽日暮
川上歸涼颺蕩孤舟靄々雲氣合漠々烟瓦浮顧思天寶初綱
紀壞不修霓裳按妖拍鼙鼓起奸謀豈無匡濟術乃為閒曠留
菱歌自來往葩辭更唱酬遂令摹寫間意度猶可求乾坤多交
態江海生暮愁白鷗飛不去千載空悠悠

河決

去年黃河決高陸為平川今年黃河決長堤沒深淵濁浪近翻
雪洪濤遠春天滔々渾疆界浩々褰市廛初疑滄海交久若銀
漢連怒散恣碎磕悍氣仍洄漩毒霧飽魚腹腥風噴龍涎鼉鼉
出菜々雁鳧下翩々人哭菰蒲裏舟行桑柘顛豈惟屋庑所
傷坎墓穿丁男望北走老稚向南遷縣官出巡防小吏爭弄權
社長夜打門里正朝率錢鳩工具畚挿排戶皆笞鞭分程杵登
登會聚鼓闐々雖云免覆溺誰復解倒懸滄漫勢稍降膏血日
已峻流離望安集荒原走疲瘵孤還尚零丁旅至總屬聯園池
非故態隣里多可憐貧家租舊地富室買新田頽垣吠黃犬破
屋鳴烏捷秋耕且未得夏麥何由全窓泥冷窺風竈土濕生烟
項筐摘餘穗小艇收枯蓮賣嫌鷄鴨瘦食厭魚蝦鮮榆膏綠皮
滑葦蘆紫芽圓乍見情多感久住心少便金堤塞已潰淇園竹
為捷玉壁沉白馬冠蓋相後先舜禹事跡鑿漢唐勞委填瓠子

空作歌寶鼎後紀年昨聞山東飢斗米直十千即今江南旱骨
肉皆棄損倉廩豈不實賑貸猶速遭恐是廊廟遠不聞道路傳
悲是天聽高致使雨露偏小臣思履載百念倍憂煎躊躇惓真
發憤結何由宣作詩備采擇孰敢希陶甄平成諒有在更獻河
清篇

上劉承旨二首

大魚但溟海微禽變淮波我生之何為感物常悲歌念茲秋蘭
華含榮在山阿孤貞固自信采掇將誰過安得紉佩服襲以芳
馨和

又

泰山不辭壤河海不擇流所以經世者賢才務旁搜我願為黍
稷得植君田疇我願為壘洗得奉君獻慎莫令棄置被褐居林
丘

送子通編脩代祀泰山二首

我昔聞泰山其上有神木高標聳乾端深根絞坤軸大枝蛟龍
盤小枝鸞鳳宿磅礴數千載居地在空谷風雨不可動况受斧
斤辱子今試往觀會當駭心目

又

我昔聞泰山其下有瑤草秀色貫四時不死亦不老日月孕至
初風露長浩浩儂人為我言服之顏色好濁世多苦欲誰能事
幽討子今試往求何煩涉蓬島

採菱女

落日照淮甸中流蕩回光窈窕誰家女採菱在橫塘風吹荷葉
低忽見紅粉粧紅粧背人去鸞起雙鴛鴦鴛鴦去後來烟水空
茫茫

貧婦歎和成詣叔應奉韻一首

結髮事夫子相期首俱皓如何割歡愛長年在遠道井臼甘勤
勞衣食無完好妾身伎區區妾心實杲杲鳥飛尚投林魚游亦
依藻君非魯秋胡貞心諒同保

題王濟川風樹堂

淒風被林目雜還無寧柯欲養親弗待歲月同流波昔人感終
極子今傷如何有哺鳥在林有祭獮在河白華與南陔悲思徒
增多

題潘叔寬望雲圖

日入無返照雲出有歸期雲歸在山阿親死獨何之思親不可
見之有墓與祠朝望怡我目夕望慰我思風吹白楊樹露滴青
松枝翩華亭鶴鳴教一何悲不有望雲作孰繼南陔詩

題張子英閔止齋

薄宦非夙志况復多艱難力辭乃得去羈絏庶少寬僦屋西溪

上聊以挂余冠住久隣里狎杯酒亦盡歡開軒望遠岫時見孤
雲還人生徒擾擾意適心自安君之何為者而能蚤休官

題蕭山包氏棣萼軒

燁燁棠棣花萼盛敷榮下承上以覆白日光輝生物性且如
此况我弟與兄飲酒生花底怡然恩義并胡為輕薄兒骨肉成
戈兵鴻雁在中野脊令之飛鳴一詠包家詩怛然感哀情

姑蘇半塘別王季野諸友

社志頗磊落別意何綢繆相送屢迴顧欲行還暫留花紅隔崇
堤外綠遍芳洲相期各努力令德比前修

餞張懷玉赴庐州治中

清時重世胄寵數超常秩公子玉雪姿袍笏照白日近辭中禁
榮遠為淮南出冠蓋餞東門悵然若有失別酒起驪歌秋風動
蕭瑟淝水清連漪楚山高岑律別駕非常流治郡良有術白馬

行翩、嘉穀已洋溢廟堂多深知賜環當在即

賦成詣井積素齋

飛雪委階下顥采滿中堂明月更被之窓戶流輝光夜深時起
望星斗低以昂庭樹度疏影林花散微香忽若白玉臺衆羽紛
韻肸涼颯然至坐覺激肝腸徘徊復徘徊衣露白如霜

題吳中陸氏菊逸軒

疎條鳴疾風落葉絲以觸端居節序移忽鳥見佳菊芳苞淡秋
黃短叢深兩綠時一瓢酒足慰幽獨飲中有真趣孰識榮
與辱歲晏霜露多白駒在空谷



重九日國學燕集分韵得口字

傑構隣象緯飛題薄箕斗雅會集諸生清談接良友商飈振庭
柯旭景耀林莽逶迤滄海濱窈窕居庸口憑虛俯流光慷慨送
盃酒

游西山次周伯溫韵

嚴鍾啟城鑰百辟聯佩紳斜漢在昂畢搖光正當寅華車出廣
陌光未生熙春陰崖凍猶結陽谷景已新雲林白洶湧石磴青
嶙峋先皇昔游幸顧瞻愴茲辰恍若鉄馬起空留玉衣陳鼎湖
去雖遠元化同其神憑危俯高樹歷覽窮荒榛梵宇抗疏巖飛
閣騰遐津虛庭潛飛起白日無纖塵長楊十二衢甲第連居民
清時治茲久天地涵深仁矧茲風氣完且復俗習淳耦耕雜畝
畝獨釣當淪漪高仙去窈窕瑞氣留氤氳於焉契嘉晤頓覺煩
抱伸蹇予敬亭下清池翳修筠時一瓢酒獨酌不計巡對此

重歸思江海愁畸人

興州道中

畿縣出西北山川何雄深况茲氣候殊岩壑更欽峯落葉委空
谷疏松表高林征馬度前阪浮雲落微陰風吹髮蕭々日暮思
沉沉豈不厭馳驅嚴程有官箴敬亭邈天際行當契冲襟

題滕王閣圖

雄城控華甸傑閣臨芳洲飛甍起千仞曲闌迴四周丹碧何輝
煌文采射斗牛帝子去不返俯仰經幾秋江黑簾雨捲山青棟
雲收孤舟天際來揚帆在中流狂飈薄暮起坐覺增煩憂何當
掃重翳白日耀神州開圖發長嘆天地一浮漚

題疊嶂參雲亭寄老士安監憲

層城極高爽傑構峙崢嶸疊嶂散霞綺凌溪迴以明旌節一戾
止登覽群芳并明月懸委佩華星粲長纓涼軒四面敞坐看鄉

霸生神功儵舒卷多態周八紘終當溥甘澍泛龍游太清

涇縣石壁道中

萬山從西來中斷忽如劈攢峰阻重関兩崖立堅壁絕壑噴飛
流觸石勢逾激神龍定其下白晝飛霹靂涉險恐羸駭凌高快
健翮須臾得仙館頗覺契幽寂入竹敞涼軒掃花吹鉄笛坐久
竟忘疲塵襟忽如滌翻思崎嶇間使我心戚

過仙霞嶺

連山界甌閩茲嶺亦峻極傑觀奠方陸高標麗園則淋漓割元
氣黯澹帶古色綿亘姑蔑墟蒼翠欲四塞仙霞高燭天五采綯
赫艷萬仞聳崢嶸百里見孤特稜角露毫芒綾脉界縫絨我行
任綱紀逾月來自北道途多艱實况迺事登涉初緣復磴危漸
轉重関側攢峰與疊嶽盡日走窮劣連岡躡衙衙絕壑瞰冒冒
遠岫忽已遠近隴復相逼躋攀吾分寸跬步輒止疑若然造層

顛軒豁始有得或列若屏幃或限若戶闕或偃若覆釜或俯若
昇錢或恭若執圭或竦若憑軾或尊若受朝或卑若就職或若
孤鶴駕或若萬馬勒或若華蓋張或若夫容植或淨若新沐或
親若初飾或爭先若馳或嚴整若飭或若進而拱或若退而初
或偃若將趨或顛若將踣或堅若長城或錯若列國或聯若
珠或牽若微纏或搏若熊羆或射若虺蜮或晃若華旒或屨若
赤纒或顯顯若昂或踽踽若抑或軒軒若舉或悄悄若點或欣
欣若喜或愼愼若戚或駭若蠢愚或穎若岐嶷或窮若龜曝或
直若隼革或差若頡頃或比若福祿或倚若弓劍或羅若罟罟
或銳若戈矛或卓或粲或或渥焉若丹或黝焉若墨或離焉若
愁或俛焉若盡或儼焉若思或慘焉若憶或鎔銜若噬或鏡削
若剋崎嶇歷萬狀意態轉惶惑矯首勞脛脰舉膝撐背臆僕夫
盡助瘁員擔屨蒲伏健駭猿猴勢快羨飛鳥翼長風度林薄草

樹紛偃及雲歸窺竇昏潤滴嵌岩泐消流乍逶迤懸溜竟涵派
豫章間棟楠榛莽翳柞栝野草結山果瑣碎多不識爛熳錦機
翻離披翠羽織竹籟笙鳳鳴藤雨淵珠滴濃淡各異態不豐亦
不畜根露獸闐歌株朽人立直幽谷蟬恠禽坳塘落瀉瀉古柴
蔓草荒廢井苔蘚蝕節屋列二三亂石羅萬億水耕雜稅餘火
種饒黍稷寒泉浸躄鷓飢食同稼穡憑高謾耕佃得廕暫休息
掬水滌煩襟坐愛清湜湜仰看高空清俯視深潭黑其上浩無
際其下深莫測豈惟龍蛇都實迺虎豹域前瞻已出險後顧猶
未即我行既已遠我志敢不力倉皇問前途日挂半岩巖峻坂
汪迢迢憂心動惻惻自從黃巢亂近復多盜賊敗屋雖僅存居
者間逃匿窓牖旋遮護几案忙拂拭頽然就床枕強起具蔬食
新醕薦茅柴晚飯貯蘆菹豈不念馳驅王事亦孔棘江東戰未
已閩南病尤亟所當效微忠孰敢怠畧刻吾道豈無補憲度亦

有式民風轉移間要在盡悃幅豈徒慰凋疲庶將別淑慝追踪
古聞人上以報皇德

謝吳景皇送菊

寒雨鳴枯林蕭條數間屋何人喚開門送我一枝菊從知主意
深遠慰客懷獨脩莖挺數尺大花着五六鵝毛發翫黃翠羽攢
生綠忽見隱士姿頓洗凡子俗縹緲傍几案徹夜散幽馥我家
東籬邊短蓑自如簇金錢雜瑣碎採之勤盈掬雖非人力巧亦
異衆眼肉于今不得見寒暑再徃復感慨成悲歌徘徊寄遐矚
安得吳江水盡變作醪醕醉酣把長劔天地眇一粟

雜體八首

卧病荒江上憂心何忡忡親友久不見况此風雨中沙草生滿
路庭菊亦成叢荏苒芳春節棲遲孤客蹤有酒且盡醉吾道豈
終窮

又
種蔬屋西頭露華日已深葉深自可摘慎勿傷其心傷心且當
慎况迺衆暴侵豈不念君子惟悴將安任葵藿傾太陽蕙蘭托
中林此物雖未微庶可媲德音

又

看月當看缺月缺終須圓賞衣莫待開花開落還先靜觀萬物
理可以全吾天東隣修滂舞西家沸繁絃歡燕猶未終飄忽如
浮烟宣庄陳蔡間伯夷首陽巔斯人雖已矣清風萬古傳
道傷百草芽春至生漸繁采之多可茹亦足供盤飧豈果肉饋
野性非所存所存陶令晚辭袂袁安深閉門古道真可尚薄俗

難與論

又

千金不為思一語終感德所以古來士慷慨重相得曉茲義利

間誰能有真識張儀漫連衡鄒生空伏軾魯連不帝秦高論抗
六國遂令千載下撫卷長嘆息

又

知黑故守白迺為白所污棄利將求名反為名所誤是非既不
真榮辱安所遇顧茲朝莫間何異祖公賦達人本大觀世事皆
細故飢餐松下苓渴飲花上露且從海翁游忘機有鷗鷺

又

疏林收霽靄方池涵密陰坐深清晝冷餘花散鳴禽緘情何所
寄撫我綠綺琴世無鍾子期誰復能知音曲終一長嘆悠悠千
載心

又

偃息北窓下好風從南來開窓延好風懷抱忽為開人生如逆
旅造物同嬰孩小知鬪蝸角營營真可哀是非何足論客至且

天台林氏山齋四詠

南山有白石，爛春遲。驅牛上山去，牛飽隨所之。耕種賴爾力，牧養須及時。短衣不掩胛，吾生竟何為。唐虞世云遠，安得還雍熙。

右飯牛山房

天台赤城山，平地起千尺。海爛紅雲垂，天立蒼壁神。光燭宇宙晃，朗晝相射。仙人居其上，塵世邈難識。與子試往觀，會使身生翼。

右百丈岩

飛龍上青天，忽聽山石裂。怒驅萬壑雷，散作半空雪。脫巾弄潺湲，展席映澄澈。毛髮為森立，盡洗人間熱。浩歌下山去，日暮風烈烈。

右瀑布泉

何人吹鳳皇，驚起萬竿玉。長風自天來，湘波蕩晴淥。停杯狎閒鷗，倚杖招黃鵠。俯仰宇宙間，滄海渺一粟。振衣聆鳳吹，丹秋

雲綠

右琅玕谷

送劉子還江右

晨颺起庭柯，落葉當階積。流光倏云變，感此送行客。遠行歸無期，况與親友隔。潛魚無縱鱗，倦鳥思斂翼。物理且如此，人事徒役役。徘徊激中腸，衣上霜露白。

秋夜和韓與玉

齋居在城西，庭戶頗幽敞。涼風起高樹，落葉時響。境靜人少來，理悟心自賞。方忻結同盟，慎勿成獨往。

借廊蕭梅竹行

山居屬多暇，數友樂幽尋。積雨弄新霽，浮雲澹微陰。青松翠絕壑，蕭然洒塵襟。論心忘遠道，矧日渺寒林。行行擷秋芳，濁酒時復斟。明發分携前山白雲深。

題朱澤民所作段吉父應奉別業圖

遠山何盤桓近壠之連屬潛颯薄陰崖鮮雲蕩陽谷飛樓表層
顛石梁懸瀑參差衆樹丹夭矯雙松綠誰與契佳賓雅會諧所
欲臨流引霞觴拂石羅野菽開罍對華軒聊以慰貞獨

春日宴蘭亭分韻得王字

陰雲翳岩谷野水漫池塘倏焉變新霽百物生輝光散策柳風
媚浣衣蘭渚薌嘉會修華簪列坐催流觴鳴禽亦有音睨睨如
笙簧悠悠千載間孰誕謝與王光陰亦何速聚散安可常及時
不歡樂白髮徒慨恍

劉平州盤谷圖

崇丘上岩峩絕壑下深曲緊誰發天巧水墨寫盤谷荒蹊遠層
巔倚薄翳空麓息陰動清興憑危引遐瞻鮮颯度長林冉冉雲
相逐晨推入蒼蔚夕釣得連綠方春薇蕨生及秋禾黍熟依迥
情乍舒展玩景逾綺我思古人心雅曠良所欲終期駕鴻濛萬

里一黃鶴

天門山為楊梓人待制賦

天門十六峰氣勢凌祝融玉壺晝飛雪丹穴夏生風壁轉六龍
影閔當九虎雄還應叫閭闔白日照精忠

蘭華雅集

拜節蘭江渚散策嘉樹林良儔亦以集武慰離索心列坐引疏
酌暫歡契冲襟風清暑氣薄日落潭水深高蔭多鳴蜩時時曳
餘音豈無繾綣意淹留畏官箴煙塵庶可息吾將遂投簪

爛柯山分韻得之字

巖城啓晨鑰夙駕踐所之華日動光彩冠蓋盛威儀揚鑣度廣
野緩策緣清池長林帶崇岡家樹何參差逶迤石梁起夭矯崖
洞垂青霞結懸虹白日生涼吹仙人香莫攀殘碁委臺基坐看
星斗出欽襟忘疲

趙敬德聚星樓

連山峙華鄂芳州亦回翔雄城直須女流止下相當層構逼繡
象仰視何低昂濟濟列仙儒冠蓋紛頡脰左曳飛霞裾右佩明
月瑤瑤席蕩神采綺動芳蕖周旋中規矩顧盼生輝光良儔豈
偶集允為時所望

王中南桃花鵝鵝圖

朱桃春畫妍綠竹晚色淨雙禽落清池愛羽時弄影伊誰悞天
巧麗采賦姝靚開圖對華尊式慰今夕永

貢禮部玩齋集卷之一

貢禮部玩齋集卷之二

元宣城貢師泰泰甫著

七言古詩

題伊尹耕莘圖

碧海晝沸白日淪禹鼎欲洗湯經仁長繩短筆行蹙躡驅牛獨
耕莘野雪有時仰面一長吁青天漫漫風烈烈身居畎畝堯舜
心忍看民生墮昏沉乾坤闔闔係出處幡然起作商家霖先農
有詩亦有譜後世南陽詠梁父

段節婦吟

河可塞山可移志不可奪義不可虧妾為段家婦年紀方及笄
上堂奉翁姑入室携兩兒死夫不死此生將何為昔如雙鴛鴦
鴛今日為孤雌昔如三春花今日成枯枝寒風吹短髮明月照
空帷百年在世能幾時父兮母兮不我知青天在上將誰欺

金谿縣葛烈女廟

金谿廟前州離：金谿廟中兩女兒青山猶是舊時色流水不盡行人悲翠翹珠珥垂孔雀廟門深鏤藤華落靈風蕭竦半空來髣髴音容啟珠箔憶昔里中初賦銀：賦日急家日貧父身榜掠痛欲絕女心憤結何由伸鬼狐夜號天漆黑大冶騰：火光烈可憐踴躍雙蛾眉爰作魚金白如雪君不見緹榮上書更肉刑木蘭遠赴可汗兵固知才畧過男子不如孝女英烈能捐生又不見湘妃江邊淚斑竹韓憑塚上連理木固知精誠可相召不如孝女感化獨神速赤龍並駕參婢娟萬古日月懸中天人生雖死名不死吁嗟丈夫鹿媿爾

送國字張教授

九鳥彈羽鰲斷足六龍飛光晝相逐何人造書泄機巧夜：天陰聞鬼哭岐山鳳遠蜩蚪空弋鳥及虫漸湮伏太史方垂鼎足

金丞相已變釵頭玉下邳拘囚死復生三千晚奏雲陽獄自泛毛錐擅楷法今古紛：踵遺躅天生真人起北方更遣浮圖出身毒六書垂世盡諧聲八體彌文貴句曲黃鍾大呂徒協和鉄畫銀鈎謾摹録大音直與造化同陰翕陽舒驗疏數先生典教元非輕直使昌言被殊俗歸來繫馬在堂堦莫厭微官就羈束人生得志亦有時萬里晴天竚黃鵠

黃河行

黃河水水闊無邊深無底其來不知幾萬里或云崑崙之山出西紀元氣融結自始地維崩今天柱折於是橫奔逆激日夜流不已九功歌成四載止黃龍化作蒼龍尾雙紅鑿斷海門開兩鄂嶄嶄尚中峙盤渦盪激回湍衝射懸崖飛沙斷岸決石瞬息而爭靡洪濤巨浪相喧逐怒聲不住侵天來初如兩戰軍方合飛礮忽下墜壁摧又如豐隆起行雨鞭笞鉄騎驅奔雷半空

瀟灑落銀屋勢連渤海吞淮瀆天吳九首今魁魁獨足潛潭雨
過老蛟吟明月夜照鮪人戩痛舟側掛帆一幅滿耳蕭蕭鳥飛
速徐邳千里半日程轉盼青山小如粟吁嗟雄哉其水一石其
泥數斗滔滔汨汨今同宇宙之悠久汎中流擊楫兮招群仙
而揮手好風兮東來醇河伯兮盃酒

題高麗李衆甫員外稼

三韓山前春草綠柘枝連村滿桑谷大牛飯罷礪雙角小犢跳
梁野如鹿夜來東原雨新足九扈向人催布穀畫省郎官朱兩
轂歸佐明王理藩服土膏初起如雪沃淺種深耕貴勻熟豈獨
勤身化殊俗要使扶餘皆寂粟新亭翼翼滄海濱手持酒肉親
撫膺鳴箏擊鼓更吹過大田多黍高過人車載輦負聲鞦韆
婁汙耶錯雜陳露處有積居有困鬱金煮酒旨已醇葵羹香飯
調酸辛句驪唱歌田暖神我有怨炙供嘉賓醉未歌帽更迭舞

韓娥拍手山月吐

為郭宗道祭酒題韓滉移居圖

田夫生長田間住辛苦移居向何處老牛帶犢驢引駒婦姑騎
過前村去牽衣累兒囊在肩瓠壺尾缶縣蒲鞵一童翦鬢隨左
右西髯偃倭相後先新來蒨屋徒四壁東鄰西鄰不相識種田
未子主家祖又恐官司看差役唐朝宰相韓晉公念爾流離多
困窮當時落筆豈無意正欲廊廟知民風願得轉徙安_山室周
公亦曾_山無逸

分題得蕪湖月送宋顯夫赴南_山愈憲

蕪湖月碧天無風江似雪與君迢遞行相隨一似都門別時
揚州覓得賣鹽船夜來泊向螺磯邊磯邊潮平人語靜但見一
鏡當空懸君心明白有如此光照荊州幾千里群曹隔岬俟新
官識得繡衣前御史山南父老來勸酒前日清光還在手

分題得姑蘓臺送吳元振赴江浙省左丞

姑蘓城外江水綠姑蘓臺是吳王築吳王燕罷越王來館娃夜
冷宮門開落花飛去春無迹江邊却起姑蘓驛馬頭旌節何皇
皇候吏傳呼謁道傍孤山梅白堤柳黃相忘入坐中書堂

為紹興虎兒治中題畫魚

大魚跳波長數尺三十六鱗如列戟江湖浩蕩起烟雲宇宙蒼
茫變朝夕子英忽騎一角蒼琴高忽跨雙尾赤中堂展玩風驟
起猶恐神光化空碧

雪後會飲瑞應宮

蓬萊仙人厭煩熱掃盡炎埃為小肩乾坤澆瀆寂無聲宇宙糝
糊氣方結初裁六出學春嬌漸疊重花妬霜烈陰風忽起勢欲
攪冷日全遮凍纜徹千門落絮亂棲鴉萬樹梨花噤啼鳩穿簾
入幕自織妍積戶堆窓更澄澈時從壁隙印尖斜還向庭隅補

虧缺篆文一一寄鵝群縞帶双双繞車轍重湖翻接浪崔嵬曠
野平堆山巖嶮高屋風吹盡日寒中堂月照通宵潔珊瑚色變
琪樹開琅玕光射瓊芽茁薄如鋪葦厚如茵園者為環斷者玦
亭臺蝶化亂翩翩巖洞獅成爭噬嚙党家金帳謾震豪王子扁
舟正奇絕始疑瑤池會王母羽蓋雲軒擁旌節又疑唐寒會群
妹徧舞霓裳樂將闌幕中武君真可人載酒滿船邀我別東蒙
道士號疏放頭戴七星衣似鉄昨朝呼我山上飲錯認梅花醉
中折今晨又請出西門有似生駒脫羈絆龍團旋試坐盤桓鶴
氅輕披行鸞躡須臾燭龍飛太空萬家冰柱懸玲瓏願將和氣
先貪窮為歌幽雅祈年豐

寄最高空隱居

盱江之水深且清朝流暮流繞盱城三頭多青山羅列如旗旌
高空先生淡無營有園數畝屋數楹前當闌闌後林麓不種桃

花種松竹：高十丈松百圍還來照我軒
憲綠先生黑髮今白頭坐閱七十春
與秋架上書可觀床頭酒可筭或中車
兮遠邁或散策兮近遊麻姑壇前蓮
萼色華子岡頭月如玦朝來西仙人
為我留秘訣石室探青霞砂床拾紅
雪長生大道無他求要知富貴如雲
浮千鍾粟萬戶侯飄忽真成水工漚
鳳凰不來黃鶴舉只今誰與先生侶
盱江：上一釣絲好共閒鷗作賓主

題山水圖

前山後山雲亂起山脚入溪清見底
溪南更有小外山散如浮塵聚如米
老楓枯櫟葉紛：下有人家深閉門
釣絲欲收風浪急却回雙艇來籬根
老翁曳杖行僂僂一童負樵一童斧
筆端意度盡神妙卷裡衣冠自淳古
商周寂寞經幾秦後來莘渭寧無人
范：耕釣去不已武陵竟隔桃花春

題江陰丘文中山水圖

老龍渴飲池中墨飛工半天成崩劣
雲烟着地凝不開白晝神驅太陰黑
筆端巧奪造化功咫尺峯巒千萬重
長林似洒楓葉雨虛亭不動松花風
隔江更有山無數江上扁舟終半渡
他年白髮許重來為君別寫容城賦

題太醫宋居仁萬竹軒

文江：上萬竿竹日暮天寒森似玉
僊人竹間結茅屋窻戶蕭蕭護深綠
天風忽捲篔簹谷坐看琅玕怒相觸
蒼龍起舞青鳧宿彷彿雲霄度仙曲
山中伊誰伴幽獨此君何人真不俗
杖策東林復西麓千載風流一時足
黃金鼎煉丹砂熟白玉壺懸湛瓊醪
野鹿啣芝虎收穀長松吹花落棋局
便當乞取長生錄月下吹簫弄漪淥

子虛道人歌

吾聞涉海有蓬萊登陸有天台攢峰
與絕壁萬仞高崔嵬翠屏

白石樹飛瀑赤城丹霞駐空谷子虛道人位其麓流水桃花繞
茅屋問之不笑亦不言却向青雲借黃鵠黃鵠今無迹青雲今
何極崇真宮中晝日寒一瓢作宇僅容膝吁嗟今子虛抱道兮
不居吁牛應牛馬應馬謂仙非仙儒非儒不騎任公之碧驢不
跨東海之生駒不學汝南市上懸一壺又不學葉令翔望飛雙
鳧紫丸入口百病蠶邯鄲枉記石室書通來年六十頭髮點漆
黑形輕類飄舉骨瘦如鶴立腰纏一百錢即去買酒喫醉醒樽
目忽大叫海天漫日山月碧許由巢父呼不得江南春水白鷗
飛六幅新蒲何日歸

書河上成安驛

扁舟落日成安驛前危播窳如篲岬高浪急不得前爭先進
寸復退尺須臾纜心定稍安獨據胡床坐深夕水邊燈影正晶
熒陌上鈴聲還絡繹聽打鼓按官船又見驅車送行客攬衣
近前試問誰往來一日多數百中原征需苦繁劇江南轉輸嚴
督責况今使者類狼貪水陸鮮肥隨口索致令編戶疲差役生
計蕭條徒四壁已將弱女納官錢更遣中男補丁額曩時河上
幾人家今日飄零竟無迹請君置此勿復言罷空令愁思積
幾點殘星散空碧船頭別我東場白

題太師贈吳學士墨竹

墨池飛出雙鳳凰青霞碧雲搖日光九重阿閣幾千尺如聽羽
節飛鏘七集賢學士瀛洲客朝回拾得連城壁便思手把釣魚
竿萬里江南秋水碧

題陳仲明所藏雙松圖

六丁驅雷山石裂垂龍角闔雙屈鉄太陰忽閃鱗甲開墨池翻
濺吳江雪阿誰挽之茅屋東萬里不斷笙竽風天台石橋俱謾
角坐中別有蓬萊宮

次赤城驛

老夫辭家今一月馬上行。過冬節山空野曠風栗烈木皮三尺吹欲裂貂帽孤裘冷如鉄癡雲作雪還未雪自是天公念鷲劣上高下高隨小職累轡哦詩亦清絕人生何苦事羈紲候吏來迎稍羅列入門登堂火微蕪須臾凍解身通熱

過浦城

浦城三百六十灘。灘上灘下灘巨石鳴飛湍。四山欲雨風亂起霆驅雪逆驚。畫寒青竹縛蓬白木榜側坐欹眠任搖蕩潭深墨黑蟠蛟螭壯士猶愁懾精爽老大生平跡且愚安得涉險同坦途形如健鷲膽如虎此心只與青天厚騰波寶劍今在不夜。光芒燭牛斗

題楊元初理問送行詩卷

玉堂學士閔西楊當時長策動四方九鼎一筆絲綸光星斗錯

落成文章白首作史誇三長書成石室金匱藏翩然拂袖辭帝旁十年歸卧衡與湘妖狐豎鼠爭陸梁芒角煌煌橫攬槍阿玄昔日焚香囊祇今馬上能挽強虎皮裁鞍騎驢驢龍泉之劍百寶裝萬夫披靡同驅羊既佐大將平武昌鏖殺袁賊走潯陽旌旗蔽日浮餘艘大江東下孰敢當耀兵桐汭勢愈張吳興嘉禾稍聚糧短衣一諫還錢唐軍門捷書報天子遼海雲帆日千里宮牆馳道平似砥披圖畫奏天顏喜在轄之功近無比賜以裘馬及弓矢錦袍文犀鞞珠履涼州葡萄苴甘且美幙中元初名最馳黃金橫帶官作理海若率職波不起百艘南還疾如駛吳山越山青靡上大開中書聽宣旨十萬甲兵齊拜跪推牛作炙膾頰鯉一時光耀盛百禮玉堂仙人元不死吁嗟畫圖何所似麟閣雲臺有如也

題二馬圖

鐵喙騶連錢，馳何年墜影。江水中蒲梢，西來八尺龍。天關十二為甬空，五花雲錦吹東風。

楊白花

楊白花無定止，昨日宮中飛。今朝渡江水，江水茫茫，千萬里。綿輕雪薄春旖旎，把臂踏歌，未已石頭城邊風亂起。楊白花無定止。

題上虞謝元公春暉堂

東海有母，有兒萬口。一出稱孝，慈兒在襁。祿寒且飢，母雖不言。心自知兒大讀書，又讀詩贈以長劍。遠從師十年，走客江水。湄氣吞雲夢，八九之星斗。錯落文章奇，神駒如龍來。月支真珠作轡，金作羈。追風掣電不受騎，便欲一蹴超天地。天池瑤草淨如拭，移得靈根種堂北。阿母升堂日，五色照見舞衣華。翠織寸心有恨，思無極。浩蕩春暉誰報得，玉桃上壽兒侍側。兒當作官。

五鼎食白髮如絲，應再黑。此時方知教兒力，文昌星高輝南國。

學圃吟

江邊乞地學種蔬，周遭步量弓百餘。十日去耕十日鋤，耕鋤未畢僕已痛。東家倩人不受呼，西家倩人納官租。菜苗虫食且半枯，昨朝許有今朝無。出門抱甕空躊躇，南隣老圃笑我迂。共倚大樹立，須臾手把一卷神農書。稱此事，烏可誣。治土貴熟甕，貴腴三犁兩耜工。力俱燥濕得所避，亢淤由不碎。确墜已抽深畦淺，壟畫成區。四分井字旁，通渠瀏。野水翻渴烏，然後種藝。皆榮敷，寒暑按節順。弗踰風和日媚，雨露濡水。菘山芥菠蔞，菜韭黃薤白葱。蒨蘇綠葵青藿華，薤蒜蒜芥茹蘋蘩蕪。辰陔芡藕苕苜蒲，蔓菁蘆葍連根株。牡丹芍藥萼重趺，茄豇豆莢懸瓠。壺紫薑紅蕒，醬耐雕胡玉。延躡鳩巧相扶，皮毛脫逆明月珠。長頸短脰膩理膚，米漿雪液如凝酥。翠鱗銀甲虬髯鬚，魁首肥顏施。

丹朱琅玕琥珀鈎珊瑚鏡劇摘撮視密跡多盈筐箱少盈裾削
 剝淹漬後膳奴甘膳龜微薊味殊主真翼、賓于、熟可羨笔
 生可咀適口絕勝羞仙厨子欲學圃不早圖只今後時將何如
 列鼎肉食稱鄙夫忽膾日厭葷與魚請子置之勿次且褒衣博
 帶歸有儒吾計子食當晨晡家園自足供所需余嗤翁言亦何
 愚翁實勤苦少暇娛白鬚黑面形瘠癯曠即胼胝汗輓轡滂即
 腰脛沒垢汙矧茲惡管與苦茶加以臭蒜雜穢葷邪蒿濁菹魚
 滑榆多食嘔泄神志瘳得失往、如瑕瑜西伯愛歌垂聖謨太
 官專膳國以墀曾習嗜東宮尼徒之有請學訊樊須孤竹採薇
 終餓殂屈到好芟竟離居元亮隱菊多令譽諸葛元修名豈虛
 陶家蠶瓮庾家殖黃金不聘蘓東湖是非榮辱理不渝世間萬
 物皆乘除翁言固辨之過諛隣家有酒且共沽醉酣仰面一長
 吁忽見黃鵠翔天衢

當塗李伯羽母夫人貞節詩

碧天夜落星如雪甲士長弓射孤月孤月照孤城千鈞懸一髮
 娉婷女兒方及笄誓將死節愧當時頸血不污春花枝夫家桑
 梓青隍垂生子伯仲好羽像青山之名天下知誰其作銘吳太
 史蛟龍筆底煙雲紫古來賢母有如此

秦郵露筋廟

飛蚊撒天連白州落日荒原泣姑嫂、留旁舍姑獨行花顏夜
 委長淮道亂教鼓翅腹正饑利嘴嗜膚血方飽妾行豈不念辛
 苦死重如山生似羽欲識當年一寸心廟前老樹啼春雨

吳中曲送楊伯幾南遊

鯉魚風起波紋綠枯葭折藹啼寒玉榜敲催曉渡江心薦聽吳
 娃舊時曲楊郎年少輕別離三尺光芒練帶垂虎丘山頭候月
 出靈岩洞口看雲飛梅花雪點身上衣慈母倚門聽馬歸

送左祥卿之香山縣尹

九星排玉雙門開，抱旗石鼓青嵬。帝子城頭跨龍去，仙人海上騎羊來。禹南燕北天萬里，五月河邊青雀起。鷓鴣膏暖射晴虹，海月光寒炯明水。宓子琴中化易成，吟得新詩字字清。馬立堦前待衛退，刺桐花裡鷓鴣鳴。

送王士鳳之龍泉縣北鄉巡檢

豹囊狡弓鳴鏑懸白玉，為玦鈎重弦。隼魚倒勒躍如電，山人爭識將軍面。將軍傳令出白斜，桴鼓無敵衆不譁。前村村長黃犢飽，四封寂。多桑麻三年最書還，北向當日賢侯在天上。腰間寶劍重提携，新恩却賜龍泉歸。

送刁萬戶奏事回蜀

肉鬚驕馬來青城，朱英畫戟擁朝京。溪子二石雙月盈，魚腸三尺秋水橫。九門洞開論五兵，却賜龍章歸柳營。雄威終發貔虎

騰猛氣，已使豺狼驚。杏花春雨別行旌，西玉舟深猩血盛。太白連雲萬里程，夕陽到處聽鶉聲。

送涇王府蒲司馬西還

重弓滿引鳴鏑和，翻身躍馬渡長河。日高射獵王半醉，軍中司馬功最多。白狼西來獻天子，腰間玉龍鱗甲紫。寶書緘奏動宸京，黃封御酒既邊庭。弦滿汭鞠幾千里，芳草萋萋春似水。鳥聲山色不勝情，枚生作賦才難比。

送鄭伴讀歸省山東

綠烟曉發扶光遲，畫橋鳴鴉度低枝。郎君恰似燕山歸，仙人笑迎兒女隨。手携松杖高過眉，雙舟滿注堂上巵。五色戲看囊中衣，香雪飄，吐盤螭。風吹雨脚沸朱絳，黃花醉飲秋正宜。况今太平天子時。

送張介巨伴讀歸省濟南

白天迷濛日脚消
雪花散亂風飄蕭
重裘着體如壓鉄
呼酒不來寒正驕
東風疋馬去千里
仰視王屋當雲霄
到家方慰母心喜
入門更聽兒啼嬌
華燈夜照舞衣熱
鬢鳴風和笙簫暗黃
着柳垂長條
虎闌春信趣還鏡
一杯遲子城南橋

送友人赴陝西作縣

角聲吹起滿城雪
北風蕭蕭嘶小驢
銀瓶細溜蒲萄熟
三疊歌殘人欲別
長安西去山嵯峨
野曠春濃詩思多
縣深花拂琴絲和
小吏呼籌衙又過
莫忘都門送時節
楊柳枝寒不堪折

輓陳克

克草廬吳先生門人也
有俊才卒年十八其妻亦痛
哭而絕

垂舟沃酒魚口熱
小袖菜衣雙風結
春歸白玉不禁寒
雪克西沉半山缺
望夫化去孤石裂
死與韓憑誓同穴
鬼狐寒食上新

丘陰風自掃梨花雪

上元送別

越王城中燈火明
即君早發越王城
春酒一壺歌一曲
楊柳風吹波面綠

閩山月送殷文學還浙西

白波洶湧風初起
綠烟漸墮水壺裏
林鳥沙鷗寒不棲
萬頃玻璃淨如水
攬衣推戶仰視天
一寸鄉心幾千里
僕夫在門嚴戒程
甯人呼籌催罷街
頭蕭蕭馬初過
城中角雞亂鳴嗟
我三天涯客握手
欲別難為情
遙憐後夜相思處
楓葉滄江一舸輕

送歸彥溫赴河西廉使

賀蘭山前河水西
金沙路平香草齊
綉衣玉節往何俗
駝馬顧影時
驕嘶當年長身多
意氣拔劍歌呼人
半醉只今太平七十

年盡把英豪化仁義甘州枸杞紅玉重涼州葡萄醬滿甕九重
有詔趨還朝莫惜馳囊少分送

貢禮部玩齋集卷之二





